

## 桃園市115年語文競賽區複賽臺灣客語朗讀國小組(饒平腔)

### 【噓！恬恬聽】劉玉蕉原作

「噓！恬恬……，你兜聽，有麼个聲？」課上到一半，先生停下來，佢个天才先生又愛變鬼怪咧！

「隔壁先生个聲大到像雷公響！」「低年級讀書聲已好聽！」「有蟬啞个聲！」……。「鳴～～」教室一下索恬，空氣凝凍，同學各各像樹頭仔樣，目呆呆个、嘴擘擘个……，先生睜等佢兜微微仔笑，課繼續上，今晡日佢愛紹介个斯係「東勢舊山線」。

「鳴～～」空氣肚又傳來舊式老火車个聲，先生講：「你兜想得著頭擺火車衝火煙个情景無？」係哦！對老輩个東勢人來講，該聲、該散在田坵、山園、溪壩个白煙，係親切也係燒暖。藍色个火車嬾日日拖等四、五節車子，晨早時摺大雪山山背个日頭比早，臨暗加等西片霞痕个光，像蛇樣慢慢擲對田園過。「確樂、確樂～～」、「火車來哩啲！」做田事个大人探頭，細人摺火車走相逐，連火車路脣个花花草草也領頭打招呼，火車「鳴～～」一聲，摺佢兜講「正來寮」，過噴一笕煙斯攞手離開。

「恁早！」像溪心沒陣魚崽仔个人潮，日日準時準點對火車

頭个大門呢出呢入。晨早時、臨暗頭坐火車个人較多，無礙清風盪入車廂肚个悠閒，窗門搵往上，外背个好風景斯接等咻啊過，田坵跔四時變化，逐日坐火車个人定著會有體會。臥頭係遠遠近近个青山，一座接一座，佢个好朋友，係卡佢頸插佢腰个白雲，好天壞天時，都有佢兜表現友誼个方式。

「鳴～～」愛過溪壩咧！大甲溪在腳下，激起一層一層浪花，帶來一聲連一聲个嘍哢，出豐原个人客會收著佢个「加油」；轉東勢个人客會接著佢該聲「辛苦哩啲！」逐日無變。這兜好風景，直直到火車頭廢忒、鐵支路拆忒，都還深深刻在老輩東勢人个腦膈肚。

「鳴～～」今這下一日兩枋个細火車，係東勢客家園區仿早期東勢線个老火車，跔舊月臺脣設个遊寮場。先生講該聲哨、形款摺原旦个衝煙火車有相像，毋過，坐過分人鼻空笕烏忒个老式火車，這仿來个玩具細火車，迂兩輪，哪會過願！

## 桃園市115年語文競賽區複賽臺灣客語朗讀國小組(饒平腔)

### 【去睺阿公阿嬤】胡明華原作

愛轉去睺阿公阿嬤了，歸家人都當暢。前一暗晡阿爸阿媽緊吩咐阿立愛早早跣起，做毋得勒床。因爭阿公阿嬤戴在山林壁角肚，阿立佢屋下人愛坐火車盤兩到車仔，再過行十過分鐘正會到，係講忒晝正出發，連食夜都可能赴毋著。

阿立最好跣阿公去屋脣个樹林捉蟲仔爽，書町有教个蟲仔，差毋多逐項都尋得著。虐毛蟲、草蟻、剪刀鉸、蝶仔、囊蚬仔、花菇仔，愛尋毋驚尋無。

阿嬤當惜阿立，見擺阿立轉來，佢就會跣工做粢粑分這個心肝仔嘗，粢粑就係佢兩子阿嬤个秘密。阿嬤毋知哪來个本等，總係揣得著這個心肝孫仔好麼个玩具，兩儕總會品好下二擺阿嬤愛送阿立麼个好爽个東西，阿立就恁樣望等兩子阿嬤過再見面。

無想著，阿立這擺轉去，正知阿公前一駁仔行路無細義跌斷腳骨，這下愛怙杖仔正停動得，連行都毋方便了。阿嬤乜手著傷，歸隻手包等藥膏，莫講落灶下做粢粑，連自家食東西都當有困難。

阿公阿嬤無法度陪等爽了，阿立試著盡失望，一路翻山過嶺

來尋阿公阿嬤爽，結果嘎變恁樣。佢儘採問<sup>1</sup>過人以後，就面臭臭仔囡入間房，毋聲毋氣闕粹粹仔<sup>2</sup>，佢斯越想越毋甘願。

臨暗仔个時節，阿爸阿媽摻阿立喊出房間，旨等阿立開嘴，阿爸塞分佢一隻袋仔，阿立打開來睺，裡背係佢望想盡久个變形金剛，這擺做得展寶分同學睺了。

「你知道這係阿嬤手著傷以後跣工下山去買分你个無？」阿媽講。「吓？」阿立著下驚，想著自家毋掏阿嬤个態度，感覺當見笑。

續下來阿爸又提出一隻畜蟲仔用个盒仔，裡肚還有一隻雞油蛄。阿立睺了黏時面紅濟炸試著當敗勢，頭犁犁仔細細聲問：「係阿公抑係阿嬤買个？」阿爸講：「阿嬤買个盒仔，若公自家捉个雞油蛄！」

阿立越想越感覺不應該，佢想著阿公阿嬤恁惜自家，著傷了還想著愛準備分自家个東西。顛倒係佢，斯知顧自家，完全無想著阿公阿嬤著傷了有幾艱苦。佢這下分醒了，決定無愛做一隻毋知人我个細孺仔，等下斯去摻阿公阿嬤會失禮，順續使妮一下，佢想：「哪儕喊阿公阿嬤恁惜佢呢？」

<sup>1</sup> 問：音 mun` / mun^；此指對人打招呼。

<sup>2</sup> 闕粹粹仔：音 ad` cud cud er`；形容氣呼呼的樣子。

## 桃園市115年語文競賽區複賽臺灣客語朗讀國小組(饒平腔)

### 【上場】徐佳好原作

「防守、防守、防守……大火鑊來咧！」「三分線，咻！擲落去咧，湛斗哪！哈哈，當慶！」佢當享受睇籃球比賽，因為做得放勢牯嘶骸喊，所有个煩惱一瞞目都會毋見忒。

記得小學四年生，該時節林書豪帶領紐約尼克隊連連續續得著好成績，全世界都為佢發狂。因為遭著這陣風，五年生佢決定去考籃球體育班。恁好運，分佢考著咧，無想著這嘎係清苦个開始。逐晨早七點半到學校訓練兩點鐘，放學後，還愛再過練點半鐘，練忒，全班愛在教室寫忒功課正做得轉。最尾練到逐個人，走運動坪十過圈都係小可事。因爭有同學做伴，還有自家對籃球个熱情，佢毋識喊慄。

見係有比賽，爺哀就會當無閒：愛準備食个、愛翕相摺錄影、愛做啦啦隊，三不二時還愛駛車仔載佢兜去比賽，屋下人个支持就係球員最大个力量。爺哀睇著佢在球場町有好表現，都會緊拍手；係球仔分人抄走<sup>1</sup>咧，都當緊張，會在脣頭安慰講：「毋怕，再過來。」一場比賽下來，大家都走到氣漘漘<sup>2</sup>又汗流脈落，

<sup>1</sup> 抄走：音 sa<sup>ˇ</sup> zeu<sup>`</sup> / sa<sup>ˇ</sup> zeu<sup>^</sup>；籃球術語，此指「抄到球」。

<sup>2</sup> 氣漘漘：音 hi<sup>ˇ</sup> pu<sup>ˇ</sup> pu<sup>ˇ</sup> / ki<sup>ˇ</sup> pu<sup>ˇ</sup> pu<sup>ˇ</sup> / hi<sup>ˇ</sup> pu<sup>ˇ</sup> pu<sup>ˇ</sup>；上氣不接下氣。

愛目珠跔等球、球仔接好勢、擲落籃框肚，若係打毋好，歇睏時會分教練咄：「你兜愛保護球仔，莫惹惹分人擲走啊，睚準徙位、擋人……。」大家緊掙汗緊淋水，凝神恬恬聽，毋敢散大氣。

打球仔，手腳難免會著傷，有時節無堵好，膝頭分人撞著、腳分人徑著<sup>3</sup>、腳盤分人踩著，積血、烏青、勾筋係平常个。佢毋驚睇醫生做復健，就驚傷重抑係功課無寫忒，教練都毋分佢上場，斯做得坐硬凳板，該時心肝肚个毋甘願比訓練還較苦哩。

小學个籃球生活盡無閒，分佢無時間上網爽遊戲，結果，毋單淨功課進步咧，身體變到當砸礮，乜學習著愛仰般摺人合作，正經體會著這句話：「贏球莫沙鼻，輸球莫失志。」無論輸贏，都分佢成長當多。

<sup>3</sup> 徑著：音 gang<sup>`</sup> do<sup>`</sup> / gang<sup>^</sup> do<sup>^</sup>；拌到。